

### ***Die verheerliking op die berg***

Jesus, Petrus, Johannes en Jakobus het waarskynlik die middag teen een van die hoë voetewels van die berg Hermon uitgeklim. Toe dit aand word, het die dissipels aan die slaap geraak.

In die stilte van die berghoogte het Jesus gebid. Met groot inspanning gebid. So intens gebid dat sy gesig begin straal het soos die son, en sy kleres wit geword het soos die lig (Matt 17:2).

Skielik het twee manne uit die hemel aan Hom verskyn: Moses, die wetgewer en Elia die wetshandhawer.

Hulle het met Jesus gepraat oor sy uittog wat Hy in Jerusalem sou voltooi. Die Griekse woord wat met "uittog" vertaal is, is die woord eksodus.

- Moses het 'n eksodus uit Egipte beleef.
- Elia het met sy hemelvaart 'n eksodus uit hierdie wêreld beleef.
- En nou praat hulle met Jesus oor sy eksodus wat Hy in Jerusalem moet voltooi.

Die evangelieskrywers sê nie aan ons wat presies hierdie twee manne vir Jesus oor sy eksodus in Jerusalem gesê het nie. Maar ons, wat die volledige verhaal oor Jesus se eksodus besit, weet wat hierdie eksodus was: dit het geloop deur Getsemane, oor Gabbata na Golgota, die graf in Josef se tuin, tot by die hemelvaart vanaf die Olyfberg.

Dit was 'n noodsaaklike, borgtogtelike eksodus: in ons plek en om ons ontwil. As Jesus die wet van God wil volbring, moet Hy hierdie ontsettende eksodus voltooi.

Deur hierdie eksodus van Jesus neem Hy ons almal wat deur die werking van sy Gees in Hom glo, saam met Hom uit die slawehuis van sonde, dood en hel na die ewige lewe in sy hemelse koninkryk. Leef dan vandag deur die krag van sy Gees as 'n verlose kind van die Here!

Sing Psalm 31:15

Prof. P.W. Buys (Emeritus)